

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 2, No. 139

原始資料: 蕭鎮國大德提供 / 張文明大德二校, 維習安大德提供之高麗藏 CD 經文, 北美某大德提供

No. 139 [No. 125(50.5)]

佛說四泥犁經

東晉西域沙門曇無蘭譯

聞如是。一時婆伽婆。在舍衛城祇樹給孤獨園。爾時世尊告諸比丘。有四大泥犁。云何為四。諸比丘。提舍大泥犁。瞿波離比丘大泥犁。禰婆達兜大泥犁。末佉梨大泥犁。諸比丘。彼提舍大泥犁。身出火焰長二十肘。諸比丘瞿波犁大泥犁。身出火焰長三十肘。諸比丘。調達大泥犁。身出火焰長四十肘。末佉梨大泥犁身出火焰長六十肘。諸有人民。欲求安隱獲其義者。若三十大海水灌彼身上。彼海水盡火不滅。猶如融銅。若有人以二十滌水著彼融銅中。彼水滌速疾滅。彼提舍比丘亦復如是。火焰不滅。若復有人欲求安隱獲其義者。復以三十大海水灌其身上。彼水速盡。所以然者。彼提舍比丘愚人。遮比丘僧使一日不食。以此因緣。使提舍比丘入大地獄諸有比丘。於瞿波離比丘。有一人起欲使安隱獲其義者。以三十大海水灌其身上。彼海水速盡。譬如二日所融銅。或有一人以三十滌水著融銅中。消盡無餘此亦如是。瞿波離比丘愚人。或有人起欲使獲安隱義者。以三十大海水灌其身上。彼大海水速盡。所以然者。彼瞿波離比丘愚人。謗舍利弗目乾連比丘。身壞命終生三惡道。墮鉢頭摩地獄以此因緣。瞿波離比丘入大泥犁。彼調達大泥犁。若復有人欲使獲安隱義者。復以四十大海水灌其身上。彼大海速盡彼火不滅。譬如三日融銅。若有人以四十滌水著融銅中。即時消盡無餘。此亦如是。調達愚人。若有人起欲使獲安隱義。以四十大海水灌其身上。彼大海水速盡彼火不滅。所以然者。調達愚人欲害如來。殺阿羅漢比丘尼。壞亂比丘僧。身壞命終趣三惡道。生阿鼻地獄中。由此因緣。使彼調達比丘入大地獄。身出火焰長四十肘。諸有比丘。彼末佉梨大泥犁。若有一人起欲使獲安隱義。以六十大海水灌其身上。彼海水速盡。彼火不滅。譬如四日所融銅。若有人以六十滌水著融銅中。即時消盡無餘。彼末佉梨亦復如是。若有一人起欲使獲安隱義者。以六十大海水灌其身上。彼大海水速盡此火不滅。所以然者。此末佉梨愚人。教受百拘梨人使行邪見。以此因緣。使末佉梨身出火焰長六十肘。如是諸比丘。四大泥犁。時諸比丘聞佛所說。歡喜奉行。

佛說四泥犁經